

190

191

192

193

194

195

196

197

198

199

嶠
南
瑣
記

魏
濬
著

中
華
書
局

叢書集成初編

君子堂日詢手鏡（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之二

統一書號：一七〇一八·一五一

嶠南瑣記

此據硯雲甲乙編
本影印初編各叢
書僅有此本

嶠南瑣記卷上

彙篋中所錄西事見大荒諸所載神人多珥蛇者珥耳飾也一曰瑱又蠶弄絲於口亦曰珥因以珥名錄竟尙有碎事及續聞者百餘種因復理而存之命曰嶠南瑣記語曰雖有棄髮必愛予於此亦云歲壬子良月湛廬山人魏濬識

兩廣樹在封川蒼梧界上分左右柯直上以其方之榮悴卜粵東西豐凶不爽

梧州察院儀門外墻地上草細茸深厚初夏螢火以

千計閃閃燭草上如月

湘竹有全紋者圍僅三四寸斑亦不老畧大則止半面有斑而體甚薄用則析取其有紋者謂之片竹道內有大椿樹二株高十餘丈蒼鬱濃茂在廳事前對立危聳數百年物也

邕州道署後有枕榔樹四株隅立競秀高俱十餘丈玩之不厭

邕人言鐵力木能上水僅可百餘年惟黃連木最能久

木之寄生者曰寓木見山海經梧之桑寄生酒爲佳然粵人不事蠶作真寄桑者甚鮮

辛亥四月予署桂上生菌若肺之垂正黃色

不死草如茅暑月置盤筵中蠅不敢近舊曰出柳州今詢之無知者

駁鹿山僧堂前池水紺碧間出蓮花五色絢爛名飛來蓮

斷腸草一名胡蔓形似黃精又一名野葛人食之立死羊食之而肥故中其毒者用羊血灌之可解也

平樂人有三女俱年幼晨出田間拾菜日晚不歸
往視之則枕藉死矣傍有斷腸草數處尙有握手
中者李白詩昔作芙蓉花今爲斷腸草芙蓉花亦
斷腸草之名花之美似芙蓉也或云葉大如人手
掌見人則獵獵鼓搖若招之者取稀腸一段杵汁
入之繫其兩端汁從中穿走腸斷乃止

予官農部河南司時曹長武陵龍君偶一日曹事畢
遣吏承印還寓吏塗遇一人云當赴曹投牒者引
去他處飲以酒吏卽昏迷若寐及覺印爲盜去矣

數日捕得盜者予偕往訊之對云用風茄爲末投酒中飲之卽睡去須酒氣盡乃寤問從何得之云此廣西產市之棋盤街驚雞藥者今土人謂之顛茄風猶顛也一名悶陀羅按本草佛說法時天雨曼陀羅花云卽此又北斗經有陀羅星使者手執此花因以名

杭藥毒草鳥不敢栖其上煎令稠蘸弩矢射野獸立斃此物予嘗見之形似獨窠蒜土人云生深山中就其處採煎須不聞雞犬聲煎成用鍼刺臂使血

出垂肩順流下如縷仍用拇指緊按刺孔令人蘸粟許於縷之末血急縮回者方可用不先按其孔血縮入肉則其人立死

嘉魚出火山下丙穴體圓小多脂九十月間始出或曰似鮐魚謂其多脂而味似之爾形絕不類也

嬾婦如山豬而小喜食田禾田夫以機杼織絰之具懸於田傍則不敢近又桂州有睡草見之則昏焉若醉亦謂之嬾婦葢

署中一老雌雞抱子十餘後止存一雌者次歲仍令

抱之得八子半月而老雌雞死八子遂隨少雌雞
飲啄哺味無異其母諸雛皆能啼猶羣處女奴逐
之始散去

溽暑頗有園池花樹偶見花根上一物蠕動就視之
乃一大蝸牛戴殼而行殼可容半升

藤江出鯖魚膽售者皆僞以黃藤膏混之黃藤亦能
行血去譬予過藤詢漁人獲有鯖不漁人以一尾
來獻狀似鮠而黑剋取其膽懸之船牕上越宿漿
裂出過半土人云膽甚薄漿發卽裂故鮮得全者

張七澤云松江人謂草魚爲白鯖魚鯖爲烏鯖魚
草魚今人家池中用草畜之者卽鮪魚也

鯪魚似白魚而稍短味不腥絕宜鱠南方以爲魚品
之最

潯州多杜宇晝夜啼不絕客居聞之甚慘

蝮蛇常在樹上伺鹿鹿過輒垂首下繞之有頃鹿死
先濡徧身令濕便舉口吞之骨角皆鑽皮而出

蛇之名甚衆烏梢菜花危干量人水箭幹壁虎鼈腦
筍獐雞冠鯢箕狎黃藤蝮寸白又有青竹標者瞎

目纏樹而生子一曰蛇盤之處必在壬地

校邕時以左江道爲文場道深邃旁有亭榭園池林木茂密業已堵塞予與書吏俱入居籌邊樓下一日晚堂畢隸人云每薄晚有人擲瓦石入言之則愈甚予視之累累積瓦上因詢于擲者答云此去外路甚遠遂不復問又一日閒步出聞闔者房內有伐樹聲因取鑰啟視之闔者云有物如犬而甚大黃色每來則伏此處竹樹間撼門入亦盜食食物適來逐之越牆去尾大如帚伐去竹樹或可冀

不來爾蓋狐已爲妖而土人未之知也

龍州卽古龍編建安中立州治時有蛟龍蟠編於南
北二津故名

劉欣期交州記龍編縣功曹左飛化爲虎還復爲吏
靖江世子宴三司是日入則有閒人數百輩先伺於
門門啟輒挨擠疾馳爭先詢之皆宗人也內臣執
挺逐之不能止亦多不冠而跣其足者云常不得
登獨秀惟此一日可乘爾山徑旣險仄斗峻遙湧
而升常遲數級方得上喧雜甚趣殊不清獨登絕

頂一眺盡郡中諸山水形勝爲佳爾諸亭館皆歛
石壁間半爲飛磴不敢從容玩適宦遊幽賞之不
相謀大畧如此王官居稍右不甚廣頗見嚴整正
殿端倚獨秀殿後亭館皆廢壞狼藉荆莽中儲君
居先王服制力未及此故爾所謂月牙池者蓋營
建時鑿取土遂稍甃之積水可汎也

陽朔道上一山高十餘仞體圓而皴內全空宛如粟
殼戍卒有栖止其中者

靈渠自北而南三十二陡又由離通銅鼓水自東而

西入永福六陡六陡冬月水消則涸絕不行

湘中記云湘水

舟至洞庭日月若出入於

其中也

自理定西行蘭麻烏沙諸嶺險絕皆刺天無蜿蜒迤
邐之狀又極隘僅容足每遇嶺則直上至絕頂乃
下下抵澗水乃已渡澗又復上如此者三四程聞
之飛雲九折勢雖險峭尚可乘騾車跨馬而行不
至若是也

諸嶺每遇狹處謂之阨子必有大小石子一堆意必

戍士積之以備他盜者然疑我與賊共若賊先不
幾藉之兵乎及詢之則云行人過者必從山下攜
石一塊寘此祝云願增脚力殊可笑亡謂當時必
有以此愚行人假之力者緩急可因以擊賊爾然
非長算也

桂泉多可飲而白龍爲最梧惟冰井清冽餘無中醉
茗材也

志圖地山川如禹貢山海經水經皆不置論注者始
旁引曲證若直寫溪山林洞屈曲如觀壁畫意趣